



Inatsisartunut ilaasortaq Agathe Fontain, Inuit Ataqtigiit  
Inatsisartut  
/Maani

**§ 37 naapertorlugu apeqqummut nr. 094-imut akissuteqaat**

Asasara Agathe Fontain

Inatsisartut suleriaasianni § 37 naapertorlugu Naalakkersuisunut arlalinnik A/S inissiaatileqatigiiffik INI-mut tunngasunik apeqquteqarputit. Apeqquteqaat uannut akisassanngorlugu innersuussutigineqarpoq.

21-04-2015  
Sags nr. 2015-113729  
Dok. nr. 1942788

Postboks 1015  
3900 Nuuk  
Tlf. (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

Akissuteqaatikka matuma kinguliani tulleriillutik allassimapput.

**1. Sooruna A/S INI-ip pisortaanera kiisalu atorfilittanut aqutsisoq Nuummi najugaqassasut, allattoqarfik Sisimiuniittoq?**

**Akissut:**

Pisortaanermik aamma atorfilittanut pisortamik atorfinitsitsinissaq pillugu aalajangiinissaq ingerlatseqatigiiffiup siulersuisuisa susassaqarfigaat. Taamaattumik apeqquteqaatip akissuteqarfigineqarneranut atugassanik ingerlatseqatigiiffimmit oqaaseqaatinik piniarsimavunga, taassumalu ilisimatitsissutigaa:

Pisortap suliassaasa annertunerpaartai Nuummiipput, taamaattumik pisortap Nuummi najugaqartuunissaa pissusissamisoorpoq. A/S inissiaatileqatigiiffik INI suli Sisimiuni qullersaqarfeqassaaq, aammalu pisortanngortussaq angalangaatsiartarnissamut piareersimassaaq, ilanngullugu Sisimiunut annertujaamik, tassani maannakkutut 50-it missaanni amerlassusilinnik sulisoqaannassalluni.

**2. Suna peqqutaava atorfiup inuttassarsiuunnerani uppersaatitalimmik suliffeqarfimmik nuussinermik misilittagaqarnissaq piumasaqaataasoq”**

**Akissut:**

Apeqqummut 1-imut akissuteqaatinni oqaatigisakka innersuussutigalugit ilisimatitsissutigisinnaavara, apeqquteqaammut akissuteqaateqarnermut atugassatut ingerlatseqatigiiffimmit oqaaseqaatinik piniarsimagama, taassumalu ilisimatitsissutigaa:

Ingerlatseqatigiiffik suliffeqarfiup aaqqissuuteqqinneqarnerani pikkorissuseqartumillu ingerlanneqarnissaani annertoorujussuarnik arlalinnik unammilligassaqarpoq. Taamaattumik pisortanngortussaq allanngoriartornerni aqutsinermik misilittagaqartariaqarpoq.

Atorfiup allagarsiissutigineqarnerani oqaaseq "nuulluni" allanngoriartornerni aqutsineq pillugu atorneqarpoq – ajoraluartumik tamanna paatsoortitsisimavoq. Taamaalilluni tigussaasumik nuunnissaq pineqanngilaq, kisianni angusaqartitsinissaq aammalu ingerlatseqatigiiffiup kulturiata allanngoriartortinnissaa pineqarluni.

Tamatuma saniatigut oqaatigineqassaaq ingerlatseqatigiiffiup siulersuisui suliniutinik assigiinngitsunik aallartitsisimammata aammalu ilaatigut ingerlatseqatigiiffik Sisimiuni najugaqartunik suliassanik suliarinnittartut atorfinnik arlalinnik ilassuteqarfigisimallugu.

### **3. Suliffeqarfimmik nuussinermik misilittagaqarnissaq qanoq atorniarneqarpa?**

**Akissut:**

Apeqqummut 2-imut akissuteqaat takuuk.

### **4. Politikikkut eqqartorneqarnikua taamatut qaffasissunik atorfinnik nuussineq qanoq siunissami kinguneqarumaartoq.**

**Akissut:**

Ingerlatseqatigiiffiup ilisimatitsissutigaa atorfinnik pingaarnernik ataavartussamik nuussinissamik pilersaaruteqarani, taamaattumik tamatuma ingerlatseqatigiiffiup isaannit isigalugu politikikkut oqallisigineqarnissaa pisariaqarsimanani.

### **5. Pilersaarutaava INI A/S tamarmi ilaannakortumilluunniit nuunneqarniarloq.**

**Akissut:**

Naalackersuisut A/S inissiaatileqatigiiffik INI-p angerlarsimaffigisaata nuunneqarnissaanik, tamakkiisumik ilaannaasumilluunniit, pillugu pilersaaruteqanngillat. Siulersuisut ilisimatitsissutigaaq siulersuisut taamatuttaaq ingerlatseqatigiiffiup angerlarsimaffigisaata Sisimiuniit allanngortinneqarnissaanik siunnersuuteqarnissamik pilersaaruteqanngitsut.

### **6. Pisortaanerit allattoqarfinni inissisimasariaqartarunnaarsimappata, Naalackersuisut takorloorsinnaavaat Namminersorlutik Oqartussat Pisortaanerat assersuutigalugu Sisimiuniit sulissappat.**

**Akissut:**

Apeqqummut 1-imut akissuteqaatinni oqaatigineqartut, A/S inissiaatileqatigiiffik INI-p nutaamik pisortassarsiornissaanut atatillugu aalajangiineq pineqartoq ingerlatseqatigiiffimmi siulersuisunit aalajangiunneqarpoq. A/S inissiaatileqatigiiffik INI-mi siulersuisut aalajangiussaasa aamma Naalackersuisut ataanni sulisussarsiornep il.il. akornanni ataqatigiittoqarnera takusinnaanngilara.

**7. Naalackersuisut piffissaq qaninnerusoq ungasinnerusorluunniit eqqarsaatigalugu A/S INI-mut qanoq pilersaaruteqarpat.**

**Akissut:**

Ingerlatseqatigiiffiup ilisimatitsissutigaa maannakkorpiaq avammut periusissiap nutaap saqqummiunneqarnissaa sulissutigineqartoq. Periusissiaq Naalackersuisunut oqaloqatigiissutigineqassaaq, aammalu A/S inissiaatileqatigiiffik INI-p qanoq inissisimanissaanut sanilliullugu, nunatsinni ataatsimoortumik ineqarnermut politikkimut Naalackersuisut eqqarsaataannik takorluugaannillu imaqassalluni

Inussiarnersumik inuulluaqqusillunga



Kim Kielsen